



19 Ogos 2024

SIARAN MEDIA
Untuk Hebahan Segera



SERANGAN MAUT MENINGKAT KE TAHAP MEMBIMBANGKAN, PETUGAS KEMANUSIAAN PERLU DILINDUNGI

Islamic Relief memberi amaran sempena Hari Kemanusiaan Sedunia (19 Ogos) bahawa serangan maut terhadap pekerja bantuan kini berada pada tahap paling tinggi dan terus berlaku tanpa sebarang tindakan undang-undang.

Data terkini yang diterbitkan minggu ini menunjukkan bahawa serangan maut ke atas pekerja bantuan telah meningkat sebanyak 400% dalam tempoh 20 tahun. Pada tahun 2023 sahaja, seramai 280 pekerja bantuan zterbunuh berbanding hanya 56 orang pada tahun 2004. Setakat ini pada tahun 2024, sekurang-kurangnya 176 orang lagi pekerja bantuan telah terkorban.

Serangan Israel ke atas Gaza menyumbang lebih separuh daripada jumlah kematian, dengan sekurang-kurangnya 286 pekerja bantuan yang hampir semuanya warga Palestin, terbunuh di Gaza sejak 7 Oktober 2023. Pengeboman tanpa henti oleh Israel telah menjadikan Gaza sebagai tempat paling berbahaya di dunia untuk menyampaikan bantuan, di mana hospital, ambulans, sekolah, tempat perlindungan, konvoi bantuan, pejabat dan infrastruktur awam lain menjadi sasaran serangan dan dimusnahkan.

Pekerja bantuan turut menjadi sasaran di negara-negara lain seperti Sudan dan Sudan Selatan, yang termasuk antara lokasi berbahaya untuk mengagihkan bantuan. Sejak perang meletus di Sudan pada April 2023, sekurang-kurangnya 37 pekerja bantuan telah terbunuh, manakala berpuluhan-puluhan lagi kakitangan telah diserang dan lebih 120 pejabat serta gudang bantuan kemanusiaan telah dirompak oleh kumpulan bersenjata.

Tahun demi tahun, bilangan orang yang memerlukan bantuan kemanusiaan di seluruh dunia semakin meningkat. Justeru, serangan berterusan ke atas pekerja bantuan ini memberi kesan yang sangat buruk terhadap golongan memerlukan tersebut.

Serangan terhadap pekerja bantuan, premis, serta aset mereka telah melanggar undang-undang antarabangsa. Namun, semakin jelas bahawa undang-undang ini tidak diendahkan dan penyerang tidak dikenakan sebarang tindakan.

Islamic Relief menyeru negara anggota PBB untuk meningkatkan usaha bagi melindungi petugas kemanusiaan, aset, dan premis seperti yang digesa dalam



Resolusi Majlis Keselamatan PBB 2730 yang diluluskan pada Mei tahun ini, serta memastikan pelaku serangan dihukum atas sebarang pelanggaran.

Langkah lebih serius juga perlu diambil untuk melindungi pekerja bantuan tempatan. Walaupun serangan ke atas pekerja bantuan antarabangsa seperti pembunuhan kakitangan World Central Kitchen di Gaza pada bulan April mendapat perhatian media dan kecaman global, kebanyakan pekerja bantuan yang dibunuh dan diserang juga adalah kakitangan tempatan yang kurang mendapat perhatian dunia.

Seorang pekerja bantuan Islamic Relief di Gaza berkongsi, "Pada bila-bila masa saja kami boleh menjadi mangsa seterusnya. Setiap hari kami pergi bekerja meninggalkan anak-anak dan keluarga, serta mempertaruhkan nyawa untuk membantu orang lain agar mereka terus hidup. Kami cuba sedaya upaya untuk membantu, walaupun keadaan sekeliling kami hampir lumpuh. Setiap hari mungkin menjadi hari terakhir bagi kami."

Nota

Hari Kemanusiaan Sedunia diperkenalkan semasa Perhimpunan Agung PBB pada tahun 2009 untuk mengiktiraf pekerja kemanusiaan yang terkorban di seluruh dunia. Ia diraikan pada 19 Ogos setiap tahun untuk memperingati serangan pengeboman di ibu pejabat PBB di Baghdad pada tahun 2003, yang mengorbankan 22 nyawa.

Sumber data serangan ke atas pekerja bantuan diperoleh daripada Pangkalan Data Keselamatan Pekerja Bantuan yang diuruskan oleh Humanitarian Outcomes: <https://www.aidworkersecurity.org/>

Mengenai Islamic Relief

Islamic Relief merupakan sebuah organisasi bantuan dan pembangunan kemanusiaan antarabangsa yang ditubuhkan pada tahun 1984 dan beribu pejabat di Birmingham, United Kingdom. Islamic Relief berkhidmat di lebih 45 buah negara dan telah membantu lebih daripada 145 juta orang sejak beroperasi. Skop bantuan Islamic Relief merangkumi bantuan kecemasan, pembangunan mampan bersepadu, pengurangan risiko bencana dan advokasi.

Mengenai Islamic Relief Malaysia

Islamic Relief Malaysia telah beroperasi sejak 2004, bertujuan untuk meneruskan bantuan kemanusiaan Islamic Relief di rantau Asia-Pasifik. Kini, Islamic Relief Malaysia berperanan sebagai pejabat penjanaan dana dan pelaksana projek tempatan dan antarabangsa.

Maklumat lanjut mengenai Islamic Relief Malaysia boleh diperoleh di www.islamic-relief.org.my

Dikeluarkan oleh: Komunikasi Strategik, Pejabat KPE Islamic Relief Malaysia.
Untuk keterangan lanjut, hubungi Zafirah Zahari di talian 019-220 1788 atau e-mel ke Zafirah.Zahari@islamic-relief.org.my